

22/07/2001

Siapa yang rakus dan putar belit?

Pemimpin dan ahli kena bidas

KATA Dr Mahathir: "Penolakan perpaduan oleh orang Melayu, kecacatan dalam sistem demokrasi, putar belit oleh ahli politik yang rakus, yang sanggup jual apa saja termasuk agama, perasaan kebencian yang tidak berasas dan keruntuhan moral orang Melayu sendiri, kehilangan semangat kebangsaan - semua ini boleh menyebabkan kuasa politik Melayu luntur dan terlepas daripada tangan mereka."

Anehnya kecaman seperti ini disambut dengan tepuk dan 'standing ovation' oleh pemimpin besar dan kecil, yang sebenarnya kena tepat oleh kecaman Dr Mahathir ini, yang sehari sebelumnya telah dikecam juga oleh Timbalan Presiden.

Memanglah ucapan ini amat berani. Tidak pernah seorang pemimpin besar Umno secara terbuka dan di depan para tamu dari pelbagai kaum, memberi amaran bahawa kuasa politik orang Melayu akan hilang. Ini memerlukan lebih daripada 'standing ovation'. Tetapi kena kata macam-macam, masih lagi gelak-ketawa dan bertepuk seperti menonton sebuah komedi - sukarlah hendak dimengerti.

Boleh jadi mereka yang kena oleh kecaman ini berpura-pura dan terpaksa ikut bertepuk. Atau sebenarnya telah mangli oleh perbuatan mereka yang rakus, korup dan mengkhianati perjuangan Umno. Muka dan hati sudah jadi tebal, tiada rasa sensitif lagi!

Ada pula bekas-bekas pemimpin - menteri dan timbalan menteri - yang terpaksa berhenti, yang bukan saja tidak diterima rakyat, malah ada yang tidak diterima oleh ahli-ahli Umno, masih cuba mengambil kesempatan menonjolkan diri dengan menganjurkan program untuk memulihkan pengaruh parti.

Memang wajar dan baik sekali tokoh-tokoh seperti ini membantu parti, kerana mereka telah mendapat banyak faedah diri. Tetapi amatlah tidak wajar menggunakan program politik, lebih-lebih lagi memperalatkan Perdana Menteri, untuk menonjol dan membersihkan diri. Akibatnya, program tak berkesan, kebencian orang bertambah.